

1408


1409

斐

然

集

二



欽定四庫全書

斐然集卷三

宋 胡寅 撰

古今豪逸自放之士鮮不嗜酒以其類也雖以此
致失者不少而清坐不飲醒眼看醉人亦未必
盡得蓋可攷矣予好飲而嘗患不給二頃種秫
之念往來於懷世網嬰之未有其會因作五言
酒詩一百韻以寄吾意雖寄古人陳迹并及酒

德之大槩以為開闢醉鄉之羽檄參差反復不能論次也同年兄唐仲章聞而悅之因錄以寄

庶幾茲鄉他日不乏寶鄰爾

辛亥

美祿無過酒星泉奠兩儀端由皆作聖意趣少人知肇命惟元祀迎春祝壽祺功深資藥石力厚起疲羸若羨千鍾美休嫌九醞遲忘情惟大禹無量乃宣尼杯飲觴初濫留連禍始基先王防以禮後世利其資默識人情異叅稽俗習移放懷無事矣問口縱言之惑溺終長夜

奢殘竟作池包茅齊服楚奏鼓盾征義大澤斬蛇後當
爐折券時彭城正高會睢水已填尸謫去憂占鵬歸來
喜受釐餅盆感田父饋餼念湘纍壑谷中宵問糟丘一
簣虧怒排樊噲盾吐卧允之頤擊憤籠錢鳳爭權殺魏
其脫靴慚力士飛燕忤楊妃司隸要殊切虞人獵已馳
魏文敦信義王猛用鈐鉞有客言雖吃何人字識奇裸
身荒已甚滌器事還卑軟飽深形頌醒狂屈受譏雖將
齊物我亦合悼功總渭水歌初闋高陽伴蚤稀湖船回

太白水殿燕西施薤露停杯唱鯨魚入海騎緬懷七子
會悵望八仙期瀟灑斜川影風流曲水湄日斜休百拜
壘恥便三辭頭上巾頻漉腰間鍤自隨諒難操北斗且
復坐東籬西海桃垂實南山豆落萁無違商士誥宜葺
杜康祠李脫朱溫弑劉為石勒縻死生當有在王伯豈
由斯五斗醒方解三人影對嬉高談傾坐聽痛飲亦吾
師責味曾圍魯提筒更憶郢安能洗晏粉聊復漲黃陂
章子以孝顯鄴舒因俊危夫妻不成屬父母或貽罹詎

比華茵污寧虞窟室墮壁懸疑角影車載號鴟夷口不
掛臧否醯猶和薄醪立苗諷鋤惡種林待充飢雨落香
檀注春融綠髓脂雲輕浮蟻子金嫩寫鵝兒滴滴葡萄
顆涵涵鸚鵡卮胸吞九雲夢筆走萬蛟螭風月江山好
賓朋笑語宜繡簾初靜捲銀燭已高垂儼雅神仙坐紛
羅水陸奇色深迷琥珀光溢艷琉璃綠笛翻羅袖紅潮
上玉肌獻酬俱繾綣沾洽盡融怡不問簷花落惟愁畫
角吹初筵何抑抑屢舞忽飲飲寒食梨花發重陽菊蕊

披龍山猶可想洛浦尚能追月滿倚瓊樹雨餘攀柳枝
高飛鴻鵠遠左手蟹螯持賢聖分清濁青齊辨等哀市
沽難共食家釀恐成私算爵商壺矢忘杯泥夾棋資深
酣道韻端的露天倪翠竹沉雲色醑醑浸玉蕤過咽輸
浩渺赴吻重連漪捲盡青荷葉顛飄白接籬埜畦供鼓
吹幽鳥奏塤箎但看朱成碧那知玉作瓷長瓶卧荒草
山郭颭青旗目井欣投轄窺門悵繫驪提壺留客住杜
宇勸人歸碧嶂下紅日飛霜點黑髭邴原良自苦畢卓

未為癡處士林泉適騷人景物悲放臣離國恨遷客去
鄉思須藉杯中物聊舒鏡裏眉暫時澆磊砢到處吐虹
霓但戒零霜露無勞灑涕洟從教禁網密莫遣醉鄉迷
為沃塵生肺應防水尅脾破除閒病惱斷送老頭皮埋
玉空煩酌揮金莫計貲三行何法制五齊孰官司喜怒
或交作陰陽因并毗達人眇天地曲士謹毫釐夜汲文
園井朝餐大谷梨渴心便渌醕大戶怕甘醅滋味將何
比經綸倘在茲一尊常準擬三頃要耘治吾道久榛莽

世途多虎豹黃封憶內醢絺繡念宗彝傳說膺新命曹
參守舊規羣生思覆護寰海厭澆漓倘負膏肓疾須憑
國手鑿欲傳方法者把盞詠吾詩

送黎才翁往荆門

聖道原來不易窮君今何處覓同風唐虞世遠精神在
鄒魯人歸事業崇德性未尊須強學道心纔勝即收功
他時杯酒論睽濶應有微言激懦衷

文定題范氏壁次韻

四海兵戈裏一家風雨中逢人問消息策杖去西東歷
數前朝亂何曾掃地空山居自有樂時對主人翁

初至青湘聞安仁帥司為曹成所襲四首

壬子

風急灘聲亂雲紅雪意酣空庭初霽集寒硯忽冰涵天
造推移密人情冷煖諳江頭聊問信春到一枝南

稅鞅年華暮圍爐夜飲酣雪梅清共映沙水凍相涵遠
意人誰會殊方俗未諳前令發湖北今日滯湘南

有道持危國無人識素書屢驚時易失更覺意難如莽

莽旌旗暗紛紛組綬紆白雲一天地今日又遷居
結束趨安地征營報急書諸軍聞好在元帥竟何如歲
晏風雲慘天低嶺海紆悲歌撫長劍吾道敢懷居

題嶽麓西軒三絕

偶向紅塵得此生歲寒松竹尚多情道人亦有生前契
幽處開軒巧見迎

月戶風窗悄不扃靜中真樂故難名山泉未識幽人意
自作穿林寫壑聲

山雨冥濛久未晴
袖中長笛為君橫
一聲吹破浮雲色
歸去呼船載月明

題指南軒二絕

老屋蕭疎四五椽
瓦爐香冷斷諸緣
客來若問名軒意
莫似維摩但默然

軒轅逸駕已旋歸
赤水玄珠却背馳
南去北來何處是
坐令楊子泣多岐

和鄧友直

坐看嘉樹溢枯流快作南江汗漫遊
曉岸林巒光寫鏡
夜窗風露冷涵秋
謏聞豈解論三豕
澁思真如曳九牛
但喜維舟時接席
一篇珠玉勝封侯

示黃岡長老二絕

歸興逢山便解頤
上人多思乞留詩
千岩萬壑經行處
他日煩師覓舊題

落日溪橋佇立時
溪雲歸盡月生遲
溪聲漏洩真消息
借問溪翁却不知

題上饒半月岩四絕

何年落月掛蒼山
長似瑤梳插翠鬟
擬琢半輪營魄處
莫教如玦只如環

瓊樓玉宇匝天開
織女天孫靜往來
月姊故應差老退
譴除私館墮岩隈

每見雲端上下弦
遙憐破鏡兩娟娟
願移此景蟾宮去
日月當令一再圓

非關狡兔月中藏
肯與癡蟄飽寸腸
只恐世人嫌冷看

故依雲岫掩寒光

題郭伯成畫竹月岩寺

夫君自是雪霜姿落筆風生更不疑
留向岩前弄明月
桂枝相伴影參差

題郭伯成畫竹道傍人家作雨勢

可但文翁會寫真典型今見一枝新
含風帶雨蕭然意
共看林宗墊角巾

過疎山題一覽亭梁谿公所書也二首

手遮西日到疎山忽得昏鴉斂翅間未暇拈香參佛祖
且須襖被扣禪關月林散影參差靜風磬傳音窈渺間
擬買一廛通水竹杖藜他日寄疎頑

林梢斜月墮金盆接影蒼茫白霧翻欲倚小欄收遯景
試憑長嘯卷遐昏寒山濯濯空堆皺埜水瀾瀾不待源
莫道此亭觀覽富未如賓日上天門

同余汝霖遊西湖觀天竺觀音永懷林和靖三絕
莫話蔣陵陳迹青松翠碧躋攀此別再遊何日夢魂長